

Two clarifications as to the 2024 raids

كتبنا: والله ببراءة، أحزابنا معنا أو ضدنا؟ هلق طلبوا اعلان مناطقنا تحت البند السابع واخضاعها لل١٥٥٩ تمهيداً لفدراليه او تقسيم. واستكمال المساعدات الانسانية حيث ممكن. سكوتكن مريب...

وكان الرد التالي: "المشكلة انه اسرائيل خطر عالجميع، شفنا شو عم تعمل بالقدس من سنين، وبفلسطين، وكيف حاولت تحتل بيروت... اذا في حزب جرّ لبنان للخطر، مش يعني ينحكم بالإعدام ع جميع اللبنانيين وينحكم عليهم بالموت، منزيد انه لبنان بلد متعدد الطوائف وللجميع ومش ملك لأي شخص، للأسف انه حتى بالحرب مش قادر هالشعب يتحد ويساعد الآخر، وللأسف في طرف سياسي جرنّا ع حرب دموية بشعة ما بدنا ياها ورح يجي يوم المحاسبة وهالناس اللي عم تموت كانوا معظمهم رافضينها... للأسف انه بلبنان الشعب طائفي كتير وما بيقدر يطلع من هالشي".

هاي لارا بليز راجعي كل كتاباتي من سنين.

انا كل محيطي خطر علي، هيدا التاريخ الحديث تما قول القديم كمان. مش بس اسرائيل. ومشكلتي مع الداخل مش وليدة هلق.

تانيّا يلي عمبكتبه هو لمحاولة الحفاظ على قسم من لبنان يلي ممثليّني قد يكونوا قادرين يحافظوا عليه.

وممكن للنازحين يلطوا فيه بأمان.

واخيراً إنتي شايقي عموم اللبنانيين مناصرين لممثليين ولو عملوا فيهن مثل عمل الحزب، ما فينا بقا ننظر عموم طايفتك تيغيروا رأيين.

ما حدن بلبنان طائفي عن عبث. ما حدن طائفي عن كره.

الطائفية نتيجة وجود جماعات بخيارات سياسية واجتماعية متناقضة ضمن نظام واحد مركزي!

بليز حظي حالك محلي،

إنت بتعرفي قديش عمجرب كون عقلاني بالتحليل وبمقاربة الامور وتعرفي اكثر، وهو الأهم، قديش قلبي مليان محبة وقديش انا مقهور عالوضع الانساني بلبنان وبغزة وغيرن...

وأكيد ما بنسى اشكرك عالثقة بانك تعبري عن افكارك عندي!

(٢) كتبنا: المخروئين خارئينا، وجماعتنا منيّمينا، وكلنا الله يعينّا

وكان الرد التالي: "دكتور مارك!! او الحساب مسروق!!! لأنو ما بتصور الدكتور ينزل هيك بوست وهييك comments.. كامل احتراممي لك!!":

حبيبي يا جهاد! الاله ما يكون صاييكن شي وتكونوا بأمان

أما وبعد،

تعليقك بشرفني لان بفرجي للقارئ قديش صدقاً انا كنت وبعدني بحب كل اللبنانيين مهما طوايفن ولو كانوا ضدي سياسياً
وبتعاطى معن بحياتي اليومية بكل محبة. وولا مرة مثّلت بهالحب، كنت دايماً صادق.

هيدا الحب يلي بعلمنا ياه يسوع. لدرجة إنك بتفضّل ما تصدّق شو عمتقرا على إنك تمتعض!

يمكن أجمل تعليق إجابني واعلاهم قيمة!

ولكن خليني قلّك: من هل منطلق، ابتعرف انو محبتي تتوازي والعلم:

وحدة ما بتمنع الثانية لا بل بيمشو سوا.

نحنّا خيي بهالبلد مجتمعات متعددة: مختلف اكاد اقول بكل شي جوهرى:

- الدين (مش قصة المعتقد انما بتأثيره على سيرورة الحياة اليومية)

- والثقافة (culture، مش قصدي فلان معلم وفلان لأ لا سمح الله)

- والنظم الاجتماعية

- وصولاً للخيارات السياسية.

نحنّا اليوم (عمبحكي عن مجتمعي الكنعاني / المسيحي يلي اكيد ناخروا السوس الفسادي المالي كما الاخلاقي ما بنكر)
مربوطين بحرب صار الها جولات بمناطقنا

- رغم عن ارادتنا،

- دون الاخذ برأينا،

- دون السماح لنا بإمكانية المشاركة بها لو افترضنا كان في شي ممكن نعمله،

- وبالأخر منصلّح ومن عمّر ومن عوّض عالمتضررين (يعني "نحمي ونبني") من جيبتنا عبر ضرايب لدولة مش
معبرتنا.

وأخر شي وحتى امام هول الكوارث منشوف ابناء المجتمع الاخر بعده مصرّ بأغليبيته على مناصرة المشاريع يلي ما
خصنا فيها، من عروبة فيصل الى عروبة عبد الناصر الى عروبة فلسطين الى سوريا مروراً بال٢٠٠٦ وصولاً لليوم.
وبعده مناصر للقيادات يلي حاملة هالمشاريع ومتعايش مع الاستشهاد والدمار (رغم انزعاجه طبعاً) لا بل متقبّل
للموضوع (وهيدا حقّه) بس اكثر بعد، بجاهر بهالشّي قدامنا وبدو يعطينا دروس.

وبخلال هال٤٠ سنة، خسرنا وتهجّرنا من مناطق كثيرة بسبب تواجد مجتمعات لبنانية ثانية بمناطقنا بقوة السلاح وبعدها
بقوة الديموغرافيا، واهمّها الضاحية، ونص الحدت، واختفينا من صور وصيدا وبعبك وطرابلس و"الغربية" والشمال
والجنوب والبقاع وجبل لبنان الجنوبي.

لذلك، تواجد مجموعات مسلحة بمناطقنا (يعني بالمناطق يلي نحن فيها أكثرية وبالتالي هي مناطق آمنة لنا (ولأي نازح) مش بس من القصف الاسرائيلي انما كمان من بطش المجتمعات الثانية بلبنان يلي يومًا ما ممكن نضطر نخلي مناطقنا من وراها مثل ما صار من قبل _ هذا ما اعنيه)،

هذا التواجد يعتبر خرق علينا فيما خص الصراع بين المجتمعات اللبنانية يلي دفعنا حقو الاف الشهداء (نحن كمان عنا شهداء، بس انتو ما علموكن تاريخنا!) تيضل عنا مطرح نلطي.

اخيراً بطلب منك تحط حالك محلّي وتشوف بعيني ومن منظاري وانا جاهز لأي توضيح

حمى الله لبنان ورحم الموتى واعطى الصبر للجميع ووعدى قادتنا لحل مشاكلنا...